

實為世道而長吁勿辭退待物論○戊辰夜四更艮方有氣如火光○教曰今

觀李秉泰上疏指予病痛引古人語勉戒誠甚切至可謂不孤召還之意也特

賜虎皮一領以示予嘉納之意噫今茲賜皮非徒取其言實為嘉其心也

李秉泰原

疏中故不載日後留記

○以洪聖輔為正言○己巳辰巳時日暈兩珥○下備忘嚴飭

掌試者行私茂公之弊以監試初試隔日也○嶺南又大水人家多漂没人物

亦渰死○庚午行召對○辛未上御進修堂召見前副率韓元震元震首陳

歷代王伯公私之別次陳復讎雪耻之義上慰諭備至仍使同入於後日召

對○以慶聖會李顯祿為承旨金相王為大司諫閔應洙為司諫申思詰為藥

房提調○壬申禮曹以冷雨有妨穡事請行四門崇祭允之○癸酉藥房入

診都提調閔鎮遠曰伏聞自昨進素饌云即今聖候未復十餘日素饌易致

傷損念後行素何如上曰三年行素雖不能前期十餘日豈不可為乎雖卿

言如此自十八日進素饌可也○甲戌上親行敬昭殿望祭○乙亥行召

對經筵官韓元震同入上曰召對異於法講經筵官先陳文義可也元震對

曰我朝立國為治大抵與宋朝相似以上言之則列聖修身之嚴家法之正

崇儒重道培養士氣同於宋朝以治道言之則文教太勝而武略不競人才浩